

## Céard is brí leis an Scríbhneoireacht Acadúil?<sup>1</sup>

### Cuid 1.1

#### Réamhrá an Aonaid

Tá teoracha bunúsacha san aonad seo faoi scríobh aistí a bheidh úsáideach le haghaidh na modúl eile a bheidh ar bun an seimeastar seo agus amach anseo. Mar sin, ba cheart go mbeifeá in ann filleadh ar an aonad nuair is gá agus an chomhairle agus na moltaí a thugtar anseo a úsáid mar is cuí.

### Cuid 1.2

#### Torthaí Foghlama an Aonaid

Nuair a bheidh an t-aonad seo críochnaithe, ba cheart go mbeifeá in ann an méid seo a dhéanamh:

- Cur síos a dhéanamh ar a bhfuil i gceist leis an scríbhneoireacht acadúil;
- Na deacrachtaí atá agat féin leis an scríbhneoireacht acadúil a liostú;
- Píosa dea-scríofa acadúil a aithint;
- Struchtúr paragraf a chur ar shliocht leanúnach;
- Roinnt samplaí den ‘dhroch-Ghaeilge’ a liostú.

<sup>1</sup> Tá roinnt mhaith den ábhar san aonad seo bunaithe ar *Scríbhneoireacht Fheidhmeach – Treoir do Mhic Léinn Lánfhásta*. Maura Kennedy & Anne Keane a scríobh don Oifig Rochtana in Ollscoil na hÉireann, Gaillimh, agus Dorothy Ní Uigín a rinne an achoimre seo.

### Cuid 1.3

#### Tusa agus an Scríbhneoireacht Acadúil

Sula mbreathnaímid ar shainmhínithe ar an scríbhneoireacht acadúil, ba cheart duit machnamh a dhéanamh ar do thuiscint féin ar a bhfuil i gceist léi. Déan an tasc féinmheasúnaithe a leanann le tús a chur leis an obair sin.

1. Céard atá i gceist leis an scríbhneoireacht acadúil?

---

---

2. Luaigh na tréithe is tábhachtaí a bhaineann leis an scríbhneoireacht acadúil, dar leat.

---

---

3. Cén chaoi a bhfuil an scríbhneoireacht acadúil éagsúil leis an 'ngnáthscríbhneoireacht'?

---

---

4. An mbíonn deacrachtaí agat teideal aiste a thuiscint?

---

---

5. An dtuigeann tú an tábhacht a bhaineann le paragrafú?

---

---

6. An dtuigeann tú an difríocht idir eagarthóireacht agus profú?

---

---

7. Cé na fadhbanna atá agat féin leis –

- a. an scríbhneoireacht trí chéile?
- b. an scríbhneoireacht acadúil?

---

---

8. An bhfuil aon bhealach agat leis na fadhbanna sin a sháru, más ann dóibh?

---

---

Má bhí tú éiginnte faoi aon cheann de na ceisteanna thuas, ná bí buartha. Breathnófar ar na ceisteanna uile a luadh thuas san aonad seo agus sna haonaid a leanann.

## Cuid 1.4

### Samplaí den Scríbhneoireacht Acadúil


Breathnaigh ar na sleachta thíos; cé acu is ‘acadúla’? Liostaigh na fáthanna thíos.

#### Sliocht 1

Is maith liom an dán Mo ghrá-sa (idir lúibíní) le Nuala Ní Dhomhnaill. Sílím go bhfuil sé an-ghreannmhar agus go bhfeicimid féith grinn Nuala ann. Is scríbhneoir maith í Nuala agus tá an-eolas aici ar sheanscéalta na Gaeilge. Is léir dom é sin ó na téamaí a bhíonn ina cuid dánta.

#### Sliocht 2

Is dán cumasach é ‘Mo ghrá-sa (idir lúibíní)’ le Nuala Ní Dhomhnaill. Is dán greannmhar é agus feicimid féith grinn an fhile go soiléir ann. Is file aitheanta í Nuala Ní Dhomhnaill agus an-eolas aici ar litríocht agus ar shaíocht na Gaeilge. Is léir é sin sna téamaí a bhíonn ina cuid dánta.



## Cuid 1.5

### Buntreoracha Maidir le Scríobh Aistí sna Dána

Aiste **dhioscúrsach** a thugtar ar aiste a scríobhtar sna Dána i.e aiste ina ndéantar saincheist a phlé. Tá tábhacht le hanailís agus tuairimí (bunaithe ar fhianaise) in aiste dá leithéid, agus ní mór a thuiscint nach mbíonn aon fhreagra ceart nó mícheart i gcás aistí den sórt seo go minic. De ghnáth ba cheart duit a bheith *neamhphearsanta* agus tú ag tabhairt faoin scríbhneoireacht acadúil. Mar shampla, b'fhearr 'Is léir' a scríobh seachas 'Is léir domsa'; b'fhearr 'sílím' agus 'ceapaim' agus focail dá leithéid a sheachaint agus aiste acadúil á scríobh.

#### 1.5.1

#### An teideal a scagadh

Ní mór duit cur chuige soiléir a bheith agat agus tú ag tabhairt faoin aiste. Mar sin, ní mór duit an cheist atá san aiste a scagadh go mion sula dtéann tú i mbun taighde nó scríbhneoireachta. Tá sé an-tábhachtach go ndéanfaí anailís ar an gceist a chuirtear ort. Scrúdaigh go mion gach uile fhocal i dteideal na haiste. Cuimhnigh gur ag freagairt ceiste (seachas ag tabhairt cuntais ar stair iomlán an ábhair) a bhíonn tú nuair a bhíonn aiste dhioscúrsach á scríobh agat.

#### Focail choitianta a úsáidtear i dteidil aistí agus a bhfuil i gceist leo:

- **Déan anailís ar:** meastóireacht a dhéanamh in léirítear laigí agus láidreachtaí.
- **Déan comparáid:** ní mór duit rudaí a chur i gcomparáid agus i gcodarsnacht lena chéile.
- **Pléigh:** argóint nó ráiteas a mheas, agus na hargóintí ar a shon nó ina choinne a scagadh.
- **Déan cur síos:** do léamh féin a thabhairt ar ábhar nó ar cheist.
- **Léirigh:** léiriú a thabhairt bunaithe ar shamplaí agus ar fhianaise.
- **Tabhair sainmhíniú ar:** míniú beacht a thabhairt ar cheist/ábhar.
- **Déan achoimre:** leagan giorraithe d'ábhar a thabhairt i do chuid focal féin.

## 1.5.2

### Céard atáthar a mheasúnú i d'aiste?

An tuiscint atá agatsa ar an gceist a cuireadh, an t-eolas atá agat ar an ábhar, do chumas anailíse, do chumas tarraingt ar réimse foinsí ábhartha agus do chuid conclúidí loighciúla féin a chur i láthair ar bhealach comhtháite.

#### Is féidir marcanna a ghnóthú:

1. Trí thuiscint a léiriú ar an gceist a cuireadh;
2. Trí eolas ábhartha a lua;
3. Trína léiriú gur féidir leat saincheistanna a scrúdú ar chúpla bealach;
4. Trí argóint dhea-struchtúrtha a bheith agat;
5. Trí chur i láthair soiléir;
6. Trí réamhrá agus chlabhsúr éifeachtach a chur leis an aiste;
7. Trí leas a bhaint as réimse foinsí (má fheileann).

#### Caillfidh tú marcanna:

1. Má thógann sé rófhada ort teacht chuig croílár an phointe;
2. Má théann tú ar strae ón bpointe;
3. Má scríobhann tú an iomarca nó mura scríobhann tú do dhóthain;
4. Má bhíonn tú doiléir;
5. Má áitíonn tú rud nach féidir a fhíorú;
6. Má bhíonn paragraf mór fada agat agus réimse mór pointí ann ach iad a bheith gan ord;
7. Mura mbíonn agat ach paragraf trí-líne ar cosúla le nóta é ná le cuid d'argóint dhea-struchtúrtha;
8. Má bhíonn drochghramadach nó drochlitriú agat;
9. Mura mbíonn aon Leabharliosta agat;
10. Cuirfear pionós géar ar an té a dhéanfaidh bradaíl liteartha.

### 1.5.3

#### An aiste a scríobh: struchtúrú

Smaoinigh ar struchtúr na ceiste: cé mhéad mír atá sa cheist? Má tá dhá mhír sa cheist bí cinnte go bhfreagraíonn tú an dá cheann. Agus tú ag breathnú ar ábhar na ceiste, fiafraigh díot féin: Cén t-eolas a theastaíonn uaim leis an gceist a phlé? Agus tú ag tabhairt faoin taighde, tosaigh le do chuid nótaí léachta, do liosta léitheoireachta, chomh maith leis an ábhar eile a dáileadh ort i rith an chúrsa. Léiríonn **paragrafú** rialta go bhfuil struchtúr soiléir ar an aiste. Ba chóir duit an fad céanna a chaitheamh le gach ceann de phríomh-mhíreanna na ceiste.

### 1.5.4

#### Paraghraif

Ní bhíonn níos mó ná 12 líne in aon alt / pharagraf amháin go hiondúil. Déan iarracht thart ar an bhfad céanna a bheith agat i ngach paragraf a scríobhfaidh tú. Toillfidh idir 2-2.5 paragraf ar leathanach amháin. Is modh struchtúraithe an-úsáideach duit dá samhlófá an aiste duit féin de réir líon na bparagraf seachas de réir líon na bhfocal. Mar shampla, is ionann 2,000 focal agus thart ar 14-16 paragraf.<sup>2</sup> Bí cinnte nach bpléitear níos mó ná mír amháin i ngach aon pharagraf: nuair atá mír amháin pléite agat, tosaigh paragraf nua. Cuimhnigh i gcónaí ar an struchtúr a bhíonn ar pharagraf maith:

- Cuir tús leis an bparagraf le hargóint .i. le príomhphointe;
- Ba chóir go leanfá an méid sin le 2-3 fho-argóint — is é sin 2-3 léiriú ar do phríomhphointe.

### 1.5.5

#### Ag scríobh an réamhrá

Ná dearmad gur réamhrá leis an aiste seachas le stair iomlán an ábhair a bheidh i gcéad pharagraf na haiste. Ba chóir na rudaí a leanas a chur sa réamhrá:

- Do fhreagairt féin ar an gceist;
- Do ráiteas aidhme i.e an rud atá i gceist agat a dhéanamh.

<sup>2</sup> Ní hé go bhfuil líon ar leith paragraf leagtha síos in aghaidh an méid focal i.e gur idir 14-16 paragraf a chaithfidh a bheith in 2000 focal; níl san fhigiúr seo 14-16 ach treoir.

### 1.5.6

#### Ag scríobh chorp na haiste

Is i gcorp na haiste a phléitear go mion an méid a dúradh sa ráiteas aidhme i.e. an méid a dúirt tú sa réamhrá faoin rud a raibh rún agat é a phlé. Cuimhnigh nach mór duit do chuid foinsí a lua go cruinn, agus iad a liostú sa leabharliosta ag deireadh na haiste. Ba chóir go mbeadh argóint gach paragraif ina príomh-mhír sa cheist a cuireadh. Nuair a bhíonn príomh-mhíreanna na ceiste clúdaithe agat, is féidir leat an aiste a chríochnú leis an gconclúid.

### 1.5.7

#### Ag scríobh na conclúide

Cuireann conclúid mhaith cruth na críochnúlachta ar an aiste. Tuigfidh an léitheoir go bhfuil ceann scríbe bainte amach agus nach bhfuil aon phointe fágtha ar lár agat. Má bhíonn freagairt ar an gceist agus ráiteas aidhme agat sa réamhrá is éasca go mór an chonclúid a scríobh.

**Déan cinnte gan eolas ná argóintí nua a lua san alt deiridh.**

Is iad príomhfheidhmeanna na conclúide:

- Dul siar ar do chuid fianaise;
- Tagairt a dhéanamh in athuair don dearcadh atá agat i leith na ceiste a cuireadh;
- Tagairt a dhéanamh in athuair don réamhrá.

### 1.5.8

#### Athdhréachtú/Eagarthóireacht

Déan cinnte agus aiste á scríobh agat go bhfágann tú am le hathdhréachtú a dhéanamh. Is éard a bhíonn i gceist le hathdhréachtú ná deis a thabhairt duit breathnú ar leagan amach iomlán na haiste féachaint an bhfuil ciall leis, an bhfuil an cheist a cuireadh freagartha agat, an bhfuil fianaise tugtha agat le tacú le do chuid argóintí.

### 1.5.9

#### Cóipeagarthóireacht/Profú

Ar deireadh ar fad a dhéantar an chóipeagarthóireacht nó an profú. Ba chóir duit seicliosta mar seo a leanas a úsáid agus an obair seo ar bun agat:

#### Ábhar

- An bhfuil an litriú ceart?
- An bhfuil an ghramadach ceart?
- An bhfuil na fíricí ceart?
- An bhfuil na sleachta athfhriotail ceart?
- An bhfuil leabharliosta curtha leis an aiste agam?
- An bhfuil an leabharliosta curtha le chéile i gceart agam?

#### Struchtúr

- An bhfuil mo dhearcadh i leith na ceiste sa réamhrá agam?
- An bhfuil ráiteas aidhme agam sa réamhrá?
- An bhfuil an fad céanna, a mhórán nó a bheagán, sna paragraif agam?
- An bhfuil argóint (i.e. príomhphointe) i gcéadabairt gach paragraif agam?
- An bhfuil baint dhíreach ag an bpríomhphointe leis an gceist a cuireadh?
- An bhfuil dhá fho-argóint (ar a laghad) agam mar léiriú ar an bpointe sin? (Fíric, tuairim agus/nó sliocht athfhriotail).
- An gcaitear súil siar sa chonclúid ar an bhfianaise a luadh i gcorp na haiste?
- An ndéantar tagairt in athuair don fhreagairt a bhí agat ar an gceist?

#### Cur i Láthair

- An bhfuil leathanach ar leith agam leis an eolas is gá air? (1. D'ainm agus do shloinne; 2. Cód nó teideal an Chúrsa; 3. Teideal na hAiste; 4. Ainm an Léachtóra nó an Teagascóra; 5. An dáta ar a bhfuil an aiste le leagan isteach).
- An bhfuil uimhreacha agam ar na leathanaigh?
- An bhfuil an cló céanna agam síos tríd?
- An bhfuil colbhaí na leathanach ar fad ar aon dul (i.e. *justified*)?



### 1.5.10

#### Leideanna don phrofú

1. B'fhearr an aiste a phriontáil seachas í a léamh ar an scáileán más féidir.
2. Iarr ar chara súil a chaitheamh ar an leagan deiridh den aiste – is minic nach bhfeicimid ár gcuid botún féin.
3. Léigh an aiste os ard – bíonn sé seo an-chabhrach i gcás na poncaíochta go háirithe.
4. Léigh go mall.
5. Bí ag cuartadh cineál amháin botúin ag an am.<sup>3</sup>
  - a. Réim Teanga
  - b. Mílitriú
  - c. Míchruinneas Gramadaí
  - d. Leaganacha neamhchaighdeánacha
  - e. Doiléire/Díbhríocht
  - f. Róthionchar an Bhéarla
  - g. Poncaíocht
  - h. Formáidiú/Leagan Amach
  - i. Míchruinneas Fíricí
  - j. Bradaíl
6. Déan píosaí beaga profaithe ag an am amháin.

---

<sup>3</sup> Féach, Mac Lochlainn, A. (2010) *In Ord is in Eagar*: 6.

## Cuid 1.6

### Leideanna Breise Stíle

Seo thíos roinnt samplaí de rudaí ar cheart iad a sheachaint, nó ar cheart a bheith airdeallach fúthu agus tú ag scríobh:<sup>4</sup>

- **áfach** – bíonn camóg roimhe agus ina dhiaidh
- **a lán** – is dhá fhocal atá anseo
- **freisin** – ní thosaítear abairt le ‘freisin’
- **ceannlitreacha**: úsáidtear ceannlitreacha le míonna ach **ní** le séasúir; úsáidtear ceannlitreacha le teangacha.
- **uatha/iolra** – bí leanúnach. Céard atá mícheart leis an abairt thíos?  
 ‘Nuair a scríobhann file dán, bíonn siad ag iarraidh a gcuid mothúchán a chur in iúl don phobal.’
- **dar le** – leanann an Chlaoninsint **dar le**. Sampla: ‘Dar le hEoin Mac Néill gur bhain an-tábhacht leis an nualitríocht sa Ghaeilge.’
- **Éire, Éireann, Éirinn** – úsáid an leagan ceart den fhocal seo!
- **Bliain, bhliain, bliana, mbliana, mblianta** – cé acu ceann atá ceart?
- **Seachain an Béarlachas (nó an Droch-Ghaeilge)** – (féach ‘Treoracha d’Aistritheoirí’, An Gúm – lch 11):
  - » ‘é sin ráite’ – b’fhearr ‘mar sin féin’
  - » ‘Ag an bpointe ama seo’ – b’fhearr ‘anois’
  - » ‘an tráthnóna seo/an bhliain seo’ – b’fhearr ‘tráthnóna (inniu)/i mbliana’.
  - » ‘Ag tarraingt suas go dtí (am)’ – b’fhearr ‘ag teannadh/druidim le’
  - » ‘Tá sé suas do X’ – b’fhearr ‘faoi X atá sé’
  - » ‘Fáil i dteagmháil le’ – b’fhearr ‘dul i dteagmháil le’

## Cuid 1.7

### Athbhreithniú ar an Aonad

San aonad seo pléadh a bhfuil i gceist leis an scríbhneoireacht acadúil agus roinnt de na saintréithe a bhaineann léi. Pléadh freisin an leagan amach a bheadh ar aiste acadúil (dhioscúrsach) mhaith, agus breathnaíodh ar roinnt rudaí ar cheart iad a sheachaint agus an scríbhneoireacht acadúil idir lámha ag duine.

<sup>4</sup> Tá roinnt de na samplaí seo bunaithe ar a bhfuil le fáil ag <http://www.forasnagaeilge.ie/wp-content/uploads/2016/06/Treoracha-dAistritheoiri.pdf>; An Gúm, Treoir d’Aistritheoirí.

## Cuid 1.8

### Ceisteanna Féinmheasúnaithe

1. Cén chaoi a bhfuil an scríbhneoireacht acadúil éagsúil leis an ‘ngnáthscríbhneoireacht’?
2. Céard is brí le ráiteas aidhme, agus cá mbíonn sé in aiste?
3. Scríobh abairtí samplacha ag úsáid na bhfocal ‘Éire’, ‘Éireann’ agus ‘Éirinn’.

## Cuid 1.9

### Freagraí ar na Ceisteanna Féinmheasúnaithe

1. Bíonn an scríbhneoireacht acadúil i bhfad níos foirmeálta ná an ghnáthscríbhneoireacht. Ní mór duit fianaise a thabhairt agus do chuid argóintí á ndéanamh agus ní mór struchtúr a bheith ar do chuid scríbhneoireachta. Caithfear a bheith cinnte go bhfreagraítear an cheist a chuirtear más aiste acadúil atá i gceist, agus ní mór i gcónaí an cheist a scagadh sula dtosaíonn tú ag scríobh.
2. Bíonn an ráiteas aidhme i réamhrá na haiste agus is ann a leagtar amach a bhfuil i gceist ag an duine déanamh san aiste.
3. Is tír dheas í Éire (An Tuiseal Ainmneach); Tá muintir na hÉireann an-fhlaitiúil (An Tuiseal Ginideach); Tá cónaí air in Éirinn (An Tuiseal Tabharthach).



## Cuid 1.10

### An Cheist a bheidh ar an bhFóram Plé ar Blackboard:

Céard is brí leis an scríbhneoireacht acadúil, dar leat?



## Cuid 1.11

### Tasc na Seachtaine Seo

Léigh an sliocht thíos agus roinn i bparagraif é. (Tá an sliocht crochta ar Blackboard i bhfoirm Word. Is féidir an ceacht críochnaithe a chur chugam ag [dorothy.niuigin@oegaillimh.ie](mailto:dorothy.niuigin@oegaillimh.ie))

#### An Gúm

Nuair a bunaíodh an Stát rinneadh ábhar éigeantach den Ghaeilge sa chóras oideachais ag an mbun agus ag an meánleibhéal ach níor chinntigh sé seo go n-athródh nósanna léitheoireachta ó Bhéarla go Gaeilge sa Ghaeltacht ná lasmuigh di. Thuig Rialtas an tSaorstáit nuabhunaithe go raibh fóirghá leis an scríbhneoireacht agus leis an bhfoilsitheoireacht a chothú sa Ghaeilge agus ba bheag foilsitheoir príobháideach sa tír a bhí ag foilsiú sa Ghaeilge ag an am sin. Cheap an Rialtas go gcabhródh bunú an Ghúim leis an bhfadhb seo a réiteach. Ba é Earnán de Blaghd, a bhí ina Aire Airgeadais ag an am, ba chúis le bunú an Ghúim, agus i measc na ndaoine eile a bhí páirteach sa tionscnamh bhí an tOllamh Seoirse Mac Niocaill, León Ó Broin agus Micheál Breathnach – ba Státseirbhísigh iad an triúr acu, agus cuireadh leagan amach na scéime faoina gcúram. D'fheidhmigh An Gúm faoin Roinn Oideachais go dtí Mí na Nollag 1999

nuair a tháinig sé faoi choimirce Fhoras na Gaeilge. Ag an tús, chuir an Gúm béim ar **chúrsaí aistriúcháin**, agus aistríodh roinnt de chlasaicí an Bhéarla, na Fraincise agus na Gearmáinise go Gaeilge sna 1930í. D'fhoilsigh sé cuid mhór ceoil freisin sna blianta luatha seo. Le bunú comhlachtaí foilsitheoireachta neamhspleácha, áfach, go háirithe sa tréimhse iar-Chogaidh, d'athraigh fócas an Ghúim agus cuireadh an-bhéim ar áiseanna teagaisc don Ghaeilge, ar théacsanna scoile agus ar fhoclóirí. Is dócha go bhfuil foilsiú fhoclóir Gaeilge-Béarla Néill Uí Dhónaill (1977) agus fhoclóir Gaeilge-Béarla Thomáis de Bhaldrathe (1959) ar na rudaí ba shuntasá a bhain an Gúm amach. Bhí conspóid ag baint leis an nGúm ón tús, áfach, agus bhí an-chuid deacrachtaí aige sna blianta luatha; bhí an deacracht a bhí ag daoine leis an ainm féin ar cheann de na fadhbanna seo, mar gur ceapadh go raibh an t-ainm 'Gúm' doiléir. Tugann Tomás de Bhaldrathe míniú ar an ainm ina aiste 'Brí agus Bunús an Fhocail Gúm', (Éigse XIX, cuid 1, 1982, 167-8) agus maíonn sé ansin go bhfuil sé bunaithe ar an bhfocal Béarla 'game', seanleagan canúna den fhocal 'game'. Cuireann sé leis an míniú ag baint úsáide as Webster's New International Dictionary 1924, agus an Oxford English Dictionary, agus deir sé gur ceann de na bríonna atá leis an bhfocal 'game' ná "a scheme or art employed in the pursuit of an object or purpose [...] a plan" (WNID); "a proceeding, a scheme" (OED).<sup>5</sup> Thug de Bhaldrathe an míniú seo i 1982, áfach, agus bhí an Gúm ar an saol le 56 bliain faoi sin. Ní léir ó chartlann an Ghúim féin an chúis ar roghnaíodh an t-ainm seo, ach tacaíonn míniú na Roinne Oideachais féin, atá le feiceáil in alt in Comhar, (Aibreán, 1980, 18-9; le míniú de Bhaldrathe thuas. Maíonn León Ó Broin freisin sa leabhar dírbheathaisnéise a scríobh sé i 1986, *Just Like Yesterday*, gurbh é Micheál Breathnach ba chúis leis an ainm seo a thabhairt ar scéim an Rialtais.

## Córais Tagartha<sup>5</sup>

### Cuid 2.1

#### Réamhrá an Aonaid

Is obair 'mheicniúil' a bhíonn i gceist le leabharliosta a chruthú agus tagairtí a úsáid i do chuid scríbhneoireachta, ach mar sin féin is cuid an-tábhachtach é seo den scríbhneoireacht acadúil. Is léiriú ar do chuid taighde iad an leabharliosta agus na tagairtí, agus cuidíonn siad leat an bhradaíl a sheachaint. Ná déan faillí iontu!

<sup>5</sup> Tá roinnt mhaith den ábhar san aonad seo bunaithe ar *Scríbhneoireacht Fheidhmeach – Treoir do Mhic Léinn Lánfhásta*. Maura Kennedy & Anne Keane a scríobh don Oifig Rochtana in Ollscoil na hÉireann, Gaillimh, agus Dorothy Ní Uigín a rinne an achoimre seo.